

大唐開元禮



大唐開元禮



大唐開元禮卷第一百十三

嘉禮

皇太子元正冬至受宮臣朝賀

并會

皇太子與師傅保相見

皇太子受朝集使參辭

皇太子元正冬至受宮臣朝賀

并會

前三日本司宣攝內外各供其職 前一日典設設

皇太子幄座於正殿東序西向衛尉設宮臣次於重
明門外伶官帥展軒懸之樂於殿庭以姑洗之均設
麾於殿上西階之西又設爲首者解劍席於懸西橫

街之南竝如常儀典儀設宮臣版位於懸南文東武西俱重行北向相對爲首設典儀位於東階東南贊者二人在南差退俱西面北上設宮臣門外位文官道東武官道西重行相向以北爲上其日未明三刻開諸宮殿門諸衛率各勒所部屯門列仗如常宮臣依時刻集重明門外皆就次各服其器服左庶子奏請中嚴近仗就陳於門外伶官帥工人入就位又伶官一人升就位諸侍衛之官各服其器服俱詣閣奉迎典儀帥贊者先入就位通事舍人引宮臣俱就門外位又舍人引六品以下先入就位左庶子版奏

外辦皇太子服遠遊冠絳紗袍以出左右侍衛如常
儀皇太子將出仗動伶官帥跪俛歎舉麾鼓祝奏永
和之樂皇太子升自阼階卽座西向坐偃麾戛鼓樂
止

凡樂皆伶官帥舉麾工鼓祝而後作偃麾戛鼓而後止

通事舍人引宮臣五

品以上次入就位宮臣初入門奏舒和之樂至位樂
止宮臣立定典儀曰再拜贊者承傳宮臣在位者皆
再拜訖通事舍人引爲首者一人詣西階爲首者初
行樂作至解劍席後樂止爲首者就席跪解劍置於
席俛伏興通事舍人引升階進當皇太子座前東面
跪賀稱元正首祚景福惟新伏惟皇太子殿下與時

同休

冬至云天正長至伏惟殿下與時同休

俛伏興通事舍人引降詣

席後爲首者跪著劍俛伏興樂作復懸南位樂止宮
臣俱再拜左庶子前承令降詣諸宮臣西北東面稱
令旨宮臣俱再拜宣令訖宮臣又再拜左庶子還侍
位典儀曰再拜贊者承傳宮臣在位者皆再拜通事
舍人以次引出還次爲首者初行樂作出門樂止左
庶子跪奏稱左庶子臣某言禮畢俛伏興還侍位皇
太子興樂作皇太子降座以入侍衛如來儀侍臣從
至閤樂止

會

伶官設登歌於殿上以南呂之均典設鋪宮臣牀座於殿上文官於皇太子幄座西南重行北向武官於皇太子幄座西北重行南向俱以東爲上設不升殿者坐席於西廊下設解劍席於懸西橫街之南俱以北爲上典膳設壽尊於殿上西序之端東向有坫加爵一於尊下又設升殿者酒尊於西廊下近北設廊下者酒尊各於其座之南皆有坫幕障以帷施設訖通事舍人引宮臣出次俱就門外位左庶子奏外辦皇太子服遠遊冠絳紗袍以出侍衛如常皇太子將出仗動樂作皇太子升自阼階卽座西向坐樂止典

儀一人升就東階上西面立通事舍人引文武宮臣
以次入就位宮臣初入門樂作爲首者至位樂止宮
臣立定

若朝會別日設
會贊拜如朝禮

左庶子前承令降命宮臣升

座在位者皆再拜通事舍人引應升殿者詣西階爲
首者初行樂作至解劍席樂止宮臣各脫舄屣跪解
劍置於席上俛伏興通事舍人引升階宮臣爲首者
一人升立於階西東向以下各就座後立其位於廊
下者又通事舍人引就座後上下立定典膳進詣階
閒北面跪奏稱典膳臣某言請賜宮臣上壽俛伏興
左庶子稱令曰諾典膳退升詣酒尊所東面立通事

舍人引爲首者詣酒尊所北面立典膳酌酒一爵授
爲首者搢笏受爵通事舍人引爲首者詣皇太子座
前東面授左庶子左庶子受爵進置皇太子前爲首
者執笏通事舍人引爲首者退東面跪稱某官臣某
等稽首言元正首祚

冬至云天
正長至

臣等不勝大慶謹上

千萬歲壽俛伏興再拜宮臣上下皆再拜立於席後
左庶子前承令少退宣訖宮臣上下又再拜左庶子
取爵奉進皇太子舉酒奏休和之樂宮臣上下皆舞
蹈三稱萬歲皇太子舉酒訖左庶子進受虛爵以授
典膳典膳受爵復於坵樂止初左庶子受虛爵殿上

典儀唱再拜階下贊者承傳宮臣上下皆再拜通事
舍人引爲首者就座後立殿上典儀唱就坐階下贊
者承傳宮臣上下俱就座俛伏坐伶官帥引歌者及
琴瑟至階下脫屣於下升就位坐又引笙管進詣階
閒北面立典膳進酒至階殿上典儀唱酒至興階下
贊者承傳宮臣上下皆俛伏起立席後左庶子到階
省酒典膳奉酒進皇太子舉酒食官令又行宮臣酒
酒至殿上典儀唱再拜階下贊者承傳宮臣上下皆
再拜搢笏受觶殿上典儀唱就坐階下贊者承傳宮
臣上下皆就座俛伏坐飲皇太子初舉酒登歌作昭

和之樂三終典膳進受虛觶復於坫登歌訖降復位
解行三周典膳進升階殿上典儀唱食至興階下贊
者承傳宮臣上下皆執笏俛伏起立席後典膳品嘗
食訖以次進置皇太子前食官令又行宮臣案設食
訖殿上典儀唱就坐階下贊者承傳宮臣上下皆就
座俛伏坐皇太子乃飯奏休和之樂宮臣上下俱飯
食畢樂止仍行酒遂設庶羞伶官帥引諸伎以次入
作若賜酒左庶子前承令詣東階上西面稱賜酒殿
上典儀承傳階下贊者又承傳宮臣上下皆執笏俛
伏起再拜搢笏立受觶就座俛伏坐飲訖俛伏起立

受虛解執笏又再拜就座俛伏坐酒行九遍會畢殿
上典儀唱可起階下贊者承傳宮臣上下皆俛伏起
立席後通事舍人引宮臣降詣解劍席後跪著劍俛
伏興納舄屨樂作復懸南位樂止會於東西廊下者
仍立於席後立定典儀曰再拜贊者承傳宮臣在位
者皆再拜廊下者拜於席後諸伎俱作通事舍人引宮臣以
次出爲首者初行樂作出門樂止左庶子前跪奏稱
左庶子臣某言禮畢俛伏興還侍位皇太子興奏休
和之樂皇太子降座以入侍衛如來儀侍臣從至閤
樂止

皇太子與師傅保相見

前一日衛尉設師傅保次於宮門外道西南向伶官帥展軒懸於殿庭以姑洗之均其日質明諸衛率

各勒所部屯門列仗典謁設師傅保位於西階之西東向三少位於師傅保之南少退東面北上太師太傅太保及三少至宮門通事舍人引就次左庶子奏請中嚴伶官帥工人入就位又通事舍人引師傅保及三少立於正殿門西差退俱東向左庶子奏外辦諸侍衛之官各服其器服俱詣閤奉迎皇太子著從省服以出左右侍衛如常儀永和之樂作至東階下

西面立樂止通事舍人引師傅保及三少入就位樂作止如常師傅保立定皇太子再拜師傅保答再拜若三少特見則三少先拜通事舍人引師傅保出樂作止如常師傅保出門左庶子前跪奏稱左庶子臣某言禮畢皇太子入左右侍衛及樂奏止如來儀

皇太子受朝集使參辭

前一日典設設皇太子幄座於東宮正殿東序西向又設宮臣次及朝集使次於重明門外其日質明所司設宮臣及朝集使位於殿庭諸衛率各勒所部屯門列仗東宮文武官依時刻集朝堂就次服袴褶

朝集使竝就次服公服左庶子量時刻版奏請中嚴
近仗就陳於閣外侍衛之官各服其器服就閣奉迎
通事舍人各分引羣官及朝集使就門外位左庶子
版奏外辦皇太子常服卽座西向坐通事舍人引宮
臣次入就位掌儀曰再拜贊者承傳在位者皆再拜
又通事舍人分引朝集使橫行北面立定掌儀曰再
拜朝集使皆再拜通事舍人承令詣朝集使前稱有
令朝集使皆再拜宣令訖又再拜舍人引出宮臣以
次出其辭禮亦如之

大唐開元禮卷第一百十三

大唐開元禮卷第一百十四

嘉禮

親王冠

前三日本司帥其屬筮日筮賓於廳事前二日主

人至賓第掌次者引之次主人公服出立於大門外

之西東向賓公服立於阼階下西面僎者公服進於

賓之左北面受命出立於門東西面曰敢請事主人

曰皇子某王將加冠請某公教之

相稱各隨官爵

僎者入告

賓出立於門左西面再拜主人答拜主人曰皇子某

王將加冠願某公教之賓曰某不敏恐不能供事敢